

SINLAI - 9
SAPTUAM DIK BULSUINA - (III)
(BIAKNA)

Thumapi: Saptuam dik leh a nasep i zilta ua, tu'n biakna toh kisai in i sui leuleu ding uh. Saptuam dik tuh amin kia mai hilou in, a biakna leng Laisiangthou toh a kituah ngeingei ding ahi. Biakna kichi tuh zahna, ngaihsang zaw-kna, thupi-ngaih zawkna pia hiam, kipumpiakna chihna ahi. Laisiangthou ah biakna a kigen uang mahmah a, Laisiangthou pumpi ah thumal 191: Thukhun Lui ah 113, Thukhun Thak ah 78 vei a tuang a kichi. Atung a kipan mihingte'n amau sang a thilhihthei zaw leh thupizaw chih a theih ziak un Pathian a bia uh chih tangthu in hon hilh. Mihingte'n Pathian khat kia a biak lai uh a om a, himahleh ahun hong pai touh zel chiang in amau lunglutna leh deihna chiat a pathiante kibawl in, Pathian dik biakna a kipan hong pialkhia uh chih tangthu in hon hilh hi. Hiai anuai a khristiante biak louh ding, biak ding leh a biak ding dan Laisiangthou pansan in i sui ding uh.

BIAKLOUH DINGTE

I. THILSIAMTE BIAK LOUH DING:

Khenkhat khovel pianken a thil om, Pathian khutsuak (nature) be pawl zong leitung ah a om hi. Hindute'n zingkal matak a thou in suahlam vak tuh lamdangsatak a en kilkel in, thumnate nei in Ni (Sun) tuh a bia uh. Huchi mahbang in Kha, Aksite leh thilsiam dangdangte leng a bia uh. "Ginna in khovelte tuh Pathian thu a suktuah ahita chih i thei uh" (Heb. 11:3). Thil-siamte be lou a, a Siamtu biak zawk ding ahih dan Laisiangthou in hon hilh. "Pathian thutak tuh zuau tangsak in, a Bawlpa biak sang in a bawl bia in a nna a sem zawta uhi. A Bawlpa lah khantawn a phat tuak ahi" (Rome 1:25).

II. MILIM BIAK LOUH DING:

Mihing Pathian siam ahi a, Pathian, mihing siam ahi kei chih i thei hi. Huchi hinapi in, leitung pumpi a mihing seh-li-suah-seh-khat in amau khutsuak mahmah, dangka, dangka-eng, sing leh suang a bawl milim bia in amai ah kuun uhi. Laisiangthou in, "Nam chih milimte tuh dangka leh dangka-eng ahi ua, mihing khutsuak ahi uhi. Kam bang a nei ua, lah a pau ngal kei ua; mitte a nei ua, lah a mu ngal kei ua; bilte a nei ua, lah a za ngal kei ua; a kam uah lah hatna (nakna) himhim a om sam kei hi. Huaite bawlte tuh huaite bang in a om ding uh; huaite gingta peuhmahte" (Sam 135:15-18) achi. Paul in Athen khua a mite kiang ah milim biak ding ahih louh dan a gen (Nasepte 17:22-29).

III. MIHING BIAK LOUH DING:

Laisiangthou ah mihing biak sawm mi khat a om a, amin tuh Kornelia ahi. Pathian angel in Tanchinhoih hilh ding in Peter a kiang ah a sawl hi (Nasepte 10). Pathian sikha Peter hong pai tak in zahnate na pia in biak a na sawmta mai hi (Nasepte 10:25). Himahleh Peter in, 'Ding in, kei leng mihing ka hi' chi in a kaithou hi (Nasepte 10:26). Huchi mahbang in, heutute pahtak ahih phot leh chi a 'mitdel sialkhau let' tuh mihing biakna ahi; Pathian pahtawina sang a mihing pahtawina a deih zawk ziak un (Johan 12:42-43). A ni bikhiah deuh nei a biak-inn zep lemlom khawng mihing kipahna lel zonna ahi.

IV. ANGEL-TE LENG BIAK LOUH DING:

Johan in Pathian angel biak tum in a khebul ah a puk hi (Kil. 22:8). Himahleh angel in, “Hon be kei hial in, hiai laibu thute kem leh na unau zawlneite leh nang sikha hihpih ka hi: Pathian be zaw in” achi (Kil. 22:9). Huai ban ah, Setan leng i biak ding ahi sam kei. Amah tuh Pathian melma ahi. Setan in Jesu a khem lai in Jesu’n, “Setan, hiai a kipat in paimang in; Toupa na Pathian na biak ding a, amah nna kia na sep ding ahi” (Matthai 4:10) a chih i mangngilh louh ding ahi.

Tulai in khenkhatte’n, Pathian angel ka manglam in hong kilak a, ‘Hiai hon chi, huai hon chi’ achi uh. Thukhun Thak gelh bukim a om nung Laisiangthou loungal, manglam maimai peuh in Thukhun Thak Hun ah Pathian a kilak kei. Pathian theihsakna (kilakna) tuh a tapa ahi (I Johan 5:10-12). Tapa theihsakna (kilakna) tuh thutak thu, Laisiangthou ahi (Johan 12:48-50).

Johan in Pathian Angel a biak dek lai a angel thugen, “Hon be kei hial in, hiai laibu thute kem leh na unau zawlneite leh nang sikha hihpih ka hi: Pathian be zaw in” (Kilakna 22:9) achih i mangngilh louh ding ahi. Pathian ta hisate adi’n angelte na-ngawn i sikha hihpih lel ahi uhi. “Mihing theihsakna bawn i saan leh, Pathian theihsakna tuh a thupizaw ngal a; Pathian theihsakna tuh hiai ahi’ Ka Tapa ka theihsakta” chih ahi (I Johan 5:9).

V. PATHIAN HING KIA BIAK DING

Eksodas 20:3 ah “Kei loungal Pathian dang nei ken” achi. “Misiang-thoute kihoukhawmna ah Pathian tuh kihtak-huai tak, akim khawng a mi tengteng sang a zahtak pen ding ahi” chih hon hilh (Sam 89:7). Mosi in, “Toupa i Pathian uh pahtawi unla, a khe ngakna bul ah bia un, amah tuh a siangthou ahi” achi (Sam 99:5).

Huaiziakin, Pathian hing khat kia i biak a, amah nna kia sep ding ahi. Pathian hing bia kichi chiatchiat lak ah leng biakna chi thum in khen sawn theih lai hi.

A. THEILOUPI A BIAKNA

Athen khua a mite’n “theilouh pathian ading” chih peuh taak in milem khawng a bia ua, Paul in a taai (Nasepte 17:22-29). Huchi mahbang in, mi tampite’n a biak Pathian leh a deih biakna vanzatte thei loupi in biak-inn kai ding uinou lou kuan theih in a thei uh. Thei loupi a Pathian biak tuh phat-tuamna bei ahi; “Pathian zaw kha ahi a, a be mite’n kha leh thutak in a be ding uh” chih gelh ahi ngal a (Johan 4:24).

B. ATHAWN A BIAKNA:

Mi tampite’n Pathian biak ding dan Laisiangthou a hoihtak a kigen napi in huai zang lou in kilawm leh hoih a sak bangbang un a bawltawm ua, huai in Pathian a bia uh. Huchi bang biakna tuh athawn ahi. Pathian thupiakte khuul a, mihing thupiak a zat ziak un (Marka 7:5-7).

III. BIAKNA DIK

Biakna dik tuh ‘kha leh thutak a biak’ ahi (Johan 4:24). Jesu’n “Na kiang ua ka thugente tuh kha ahi a, hinna leng ahi” achi (Johan 6:63). Thutak tuh Pathian thu, Laisiangthou ahi (Johan 17:17). Khristiante adi’n Laisiangthou tuh a bukim sipsip hi (Jakob 1:25; II Tim 3:16-17). Pathian biak ding dan leng kintak in a tuang hi. Huaiziakin, kipumpiakna toh lungsim tak a

Laisiangthou dungzui a biakna tuh biakna dik, Pathian deihdan ahi. Thukhun Thak dungzui a biakna dik vanzatte aban-ban in i en ding uh.

- 1. LASAK:** Pathian' Kha pi in Paul in Ephesa leh Kolosa Saptuamte kiang ah la sak a Pathian phat ding in a thuhilh (Eph. 5:19; Kol. 3:16). Jakob 5:13 ah kipaktak a la sa di'n a hon hilh. Paul leh Sila in suangkulh sung ah la sa in Pathian a phat uh (Nasepte 16:25). Thukhun Thak ah Pathian biakna di'n tumging koimah ah a gen kei. Tumging gen khak nak sang in lungtang tengteng a Toupa kiang a la sa a, 'aw' a ging kilawm bawl ding in hilh in i om zaw hi (Eph 5:19). Hebrute gelhtu in 'Phatna kithoihna Pathian kiang a i lat gige ding tuh amin gupna mukte gah ahi' achi (Heb 13:15). Huaiziakin, Pathian thu tuh bangmah toh hel louh, ngaihdan leh thil dangdangte sukbuah louh leh siangthou ahih ding ahi (I Peter 2:2).
- 2. THUMNA:** Thumna in thil ahih theih dan Laisiangthou in a hon hilh hi (Jakob 5:17-18). Huaiziakin thumna tuh khristiante naakna a kichi hial hi (I Thess. 5:17-18). Kipathu gen leh thumnate limsak gige ding a hilh in i om uh (Eph. 6:18). Pentikost ni a piangthak 3,000-te'n biakna kikhopna hon neih un, thumna a nei uhi (Nasepte 2:42).
- 3. LAISIANGTHOU SINNA (THUKIHILHNA):** Timothi tuh naupang ahih lai apan in Laisiangthou sinsak in a om (II Tim. 3:15). Paul in Timothi kiang ah sim khawng, thuhilh khawng, thuginpi khawng (English Laisiangthou ah) limsak ding in a hilh (I Tim. 4:13). Paul mah in "Thu tuh gen in, ahun ah bang, ahun lou ah bang leng pang zel in; thuakzoutak a thuhilh kawm in a siamlouh dan uh theihsak inla, taihilh inla, hasuan in" achi (II Tim. 4:2). Khristiante niteng a kiasuantuah gige ding a hilh i hi (Heb. 3:13; 10:25). Ni sagih nimasapen a nungzui masate'n biakna kikhopna a neih un, Paul in thugenna a nei chih i mu hi (Nasepte 20:7).
- 4. THEIHGIGENA ANKUANG:** A sih ma in Jesu'n hiai theihgigena ankuang a patkhiakpih a, aban a hih zel ding in thu a pia (Matthai 26:26-29; I Kor. 11:23-26). Nungzui masate'n ni sagih nimasapen in Toupa sihna theihgigena ankuang a um khawm zel uh chih i mu (Nasepte 20:7; I Kor. 11:23-26). Nasepte gelhtu Luka in, "Ni sagih nimasapen a tanghou balkham ding a ka kikhop lai un" achi (Nasepte 20:7). Thukhun Lui ah Khawlai (Sabbath) tan ding Pathian in thu a piak lai in 'Khawlai tengteng tang un' achi tuan kei a, "Khawlai tang in" achi lel hi (Eksodas 20:8; 31:13). Khawlai lak a hiai ni tan ding chih om tuam tuanlou ahihmanin Khawlai tengteng a tan mai uh a ngai. Huchi mahbang in, theihgigena ankuang leng ni sagih nimasapen in a lui uh chih i muh ziak in i muh ni hong tun teng a lui a ngai.
- 5. THILPIAK:** Khristian masate'n ni sagih nimasapen mah in thilpiak a pia uh chih i mu (I Kor. 16:1-2). Hiai thilpiak hi kiphuutluh thoh ahi kei a, sawm-a-khat leng ahi kei. Michih in a kiphah dan bang zel a kipaktak a a tawikhawmte uh ahi (II Kor. 8:12-15; 9:6-8). Hichi bang a thilpiak tawikhawm tuh 'Misiangthoute taksap-awng hukna, Pathian kiang a kipathu genna leh Pathian hihthupina ahi' achi (II Kor. 9:12-13).

TOUPA NI:

Johan in "Toupa ni in kha in ka om" achi (Kilakna 1:10). Toupa ni, ni sagih nimasapen (kal khat a ni 7 sung a nimasapen) 'Pathian-ni' (Sunday) kichite ani kibang ngen ahi a, Thukhun

Lui a Khawlani (Sabbath) ahi kei chih i theih ding ahi. ‘Ni sagih nimasapen’, ‘Toupa Ni’ leh ‘Pathian-ni,’ ni kibang ahi i chih theihna aziak thum lel i gen ding.

1. A.D. 30-100 sung a laigelhtu Ignatius in, “Khris lawmte tengteng in Toupa Ni tuh kal khat sung a ni thupi leh poimoh pen, a thohnawn ni lopna a zat ding ahi” achi. — The Anti-Nicene Fathers, Vol. 1 p. 63
2. A.D. 135-200 sung a laigelhtu Irenaeus in, “Toupa thohnawna thuguk tuh Toupa Ni chih lough, ni tuam a lop theih ahi kei ding” achi. — MC Clintock and strong Ency Vol. V p.507
3. A.D. 300 a Alexandria a Bishop a pang Peter in, “Toupa Ni tuh hiai ni a thounawna ziak in kipahna ni in ka zang uh” achi. — MC Clintock and Strong Ency Vol. V p.508

Hiai atung a thumte ban ah, “Toupa ni tuh kal teng a Toupa thohnawna lop ni leh thohnawn ni, ni sagih nimasapen toh kibang ahi” chih i mu. — MC Clintock and Strong Ency Vol. V p.505

Huaiziakin A.D. 30-300 sung in khristian masate’n ni sagih nimasapen in biakna a nei uh chih a Chiang mahmah hi (Nasepte 2:42; 20:7; I Kor. 16:1-2 sim in).

Ni sagih nimasapen, Toupa ni (Pathian ni) a biakna a neih sese uh a poimohna tuh:

1. Khris thohnawn ni ahi (Luka 24:1; Marka 16:1-3,9).
2. Jesu Khris a thohnawn nung a leitung a a kilak masakpen ni ahi. (Matthai 28:9-10).
3. Khasiangthou piak a om ni ahi (Nasepte 1:4-8; 2:1-4). Pentikost ni tuh ni sagih nimasapen ahi gige (Lev. 23:15-16).
4. Thukhun Thak zat pat a om ni ahi (Luka 24:48-49; Nasepte 2:36-41).
5. Khristian om masakpen ni ahi (Nasepte 2:36-41).
6. Tanchinhoih sermon piak masak pen ni ahi (Nas 2:14-36; I Kor 15:1-4).
7. Khris in a Saptuam a phuhkhiak ni ahi (Nasepte 2:36-47).
8. Piangthak masapente pianthak ni ahi (Nasepte 2:36-41).

Huaiziakin, kha leh thutak a khristiante’n Pathian a biak ni ding tuh ‘Toupa ni’ (ni sagih nimasapen) ahi. Thukhun Lui a Israelte’n Aigupta sal a a pawtkhiak ni uh theihgigena “Paikan ankuang” a lui zel bang un khristiante’n leng khelhna apan suahtak sak a i om ni, Khris thohnawn ni, ni sagih nimasapen a theihgigena ankuang lui ding a kikhawm-khawm ding in hilh in i om (Nam 9:5; Diut 16:1; Nas 20:7). ‘Kha leh thutak a bia’ chih tuh lungsimtak a Laisiangthou a kigente: Lasak, Thumna, Thugenna, Thilpiak leh Theihgigena Ankuang lunate zang a Pathian biak genna ahi. Hiai biakna vanzat 5-te lak ah lasak, thugen leh thumnate a ni bikhiah a om kei. Himahleh thilpiak leh Toupa sihna theihgigena ankuang bel ni sagih nimasapen chitchiat a hih ding in a gen hi (Nasepte 20:7; I Kor 16:1-2). Huaiziakin Toupa ni, ni sagih nimasapen (Pathian-ni/sunday) in Laisiangthou in biakna vanzat dia a na gen 5-te zang a nungzui masate mahbang a biakna neih ding ahi.

Hebrute 10:25-na a a gen bang in kahasuantuah ding leh kihihhattuah ding in Sepnawn-ni hiam, Ninga-ni hiam ei ut hunhun in, ‘Toupa ni’ lou in leng kikhopna nei in la i sa thei a, thu i

kihilh thei a, thumna i nei thei. Ahihhangin 'Toupa ni' chihlauh, nidang in thilpiak lakkhawm hiam, Toupa theihgigena ankuang lui ding in Laisiangthou in hon hilh kei. Huchi bang a hih tuh mihing kithuhilhna a biakna, biakna thawn ahi (Marka 7:6-8; II Johan 9).

SINLAI 9-NA ETKHIAKNA

1. Biakna kichi thumal Laisiangthou pumpi ah bangzah vei a tuang a? Thukhun Lui ah bangzah? Thukhun Thak ah bangzah?

2. “A bawlpa biak sang in a bawl bia in a nna a sem zawta uh. A bawlpa lah khantawn a phat tuak ahi” achihna Laisiangthou tang gelh in.

3. “Nam chih milimte tuh dangka leh dangka-eng ahi ua, mihing khut suak ahi uhi... Huaite bawlte tuh huai a bang in a om ding uh; huaite gingta peuhmahte” achih na Laisiangthou tang gelh in.

4. Mi khat mihing biak sawm a,”Ding in, kei leng mihing ka hi” Peter in a chihna pa min bang ahia? _____

5. Johan kiang a “Hon be kei hial in... Pathian be zaw in” chi kua ahia?

6. Thukhun Thak hun a mite Pathian in A thu (Laisiangthou) zang a A houpih chihlauh lam tuam a kilak in mi a houpih hia?

7. Pathian hing bia kichi a Laisiangthou zang chiatchiat lak ah biakna chi bangzah in a khensawn theih lai a? A minte uh gen in.

i) _____

ii) _____

iii) _____

8. Pathian deihdan a i biak theihna di'n bang i chi biak dia? (Johan 4:24).

9. Thutak bang ahia?

10. Thukhun Thak hun a kha leh thutak a i biak theihna dia Laisiangthou in a gen biakna vanzat chi 5-te gen in.

i) _____

ii) _____

iii) _____

iv) _____

v) _____

11. Thukhun Thak hun ah sawm-a-khat a phuut hia? A phuut leh/a phuut kei leh koi Laisiangthou tang ah?

12. Thukhun Lui a Israelte kiang a Pathian in 'Khawlni (Sabbath) tang un' achih Thukhun Thak hun a leng tan lai ding ahi diam?

13. Khawlni (Sabbath) kichi tulai a ni sim dan in bang ni ahia?

14. Ni sagih nimasapen, Toupa ni (Pathian-ni) khristiante' adia a poimohna, aziak 4 gen in.

i) _____

ii) _____

iii) _____

iv) _____

15. Thukhun Thak dan in i ut hunhun a thilpiak piak ding ahi diam? Ahih keileh bang ni in.

16. Pastorte lemtanhun-hun a Theihgigena Ankuang lui mai ding ahi diam? _____ .
Ahih keileh bang ni in _____ Laisiangthou tang gelh in:

17. Kuate ahia Theihgigena Ankuang lui thei dingte?
